



Tã nhũm Ijapew ra htujarô hã mytwrý kêp 6 nhũm  
Tĩrtũm axte kapêr o wrýk xwýnh pê Gapriewja mẽ.  
Nhỹri Garirej kamã krĩ pê Najare hwýr kumẽ nhũm ma  
hwýr wrý. Mẽhõ pê Marir wýr wrý. Nhũm ra Juje ho  
mjên kaxyw. No ãm kormã hkukrit rãhã ho mjên kaxyw.  
Jujeja Marir pyrà nẽ kêp pahi finat Tawi kanrêhã  
htàmnhwý  
na pre.



Hãmri nhũm Gapriew kãm: —Kwa tee  
ri amnhĩ kukamã ajamaxpěr kêt nẽ.  
Tĩrtũm kãm ajapêê. Kot kaj atujarô  
nhũm akra kato nẽ myre. Ka hã  
hixi mẽ nhũm kêp Jejus. Koja  
Tĩrtũm amã ho mex rax nẽ.  
Nẽ koja mẽ piitã mẽ kãm kêp  
amnhĩ Kra hã ho amnhĩrĩt. Nẽ  
mẽ apê Ijaew o amnhĩptàr kaxyw  
koja mẽ akaxyw ãm nhũm higêt pahi  
Tawi pyrà nẽ mẽ ato amnhĩptàr o pa.  
Mẽ ate amnhĩ wỳr kamã ajamak o

apa xwỳnhta koja. Tĩrtũm kãm  
hprãm xà hkôt koja mẽ ato  
amnhĩptàr rãhã ho pa. Anẽ.



Nhũm pre ã kãm kapẽr anẽ nhũm  
amnhĩ tã kuma nẽ tee ri amnhĩ  
kukamã hamaxpẽr hãmri nẽ kãm:  
—Xê gàà nẽ. Tanhmã kot pa kêt  
we amnhĩ tonnẽ ixtujarô?  
Kormã ixkukrit nẽ mo  
kormã inhmjên? Mê.



Xà Juje kot ixkamã hkra hkukamã na ka  
ã ri inhmã axujarẽnh anẽ? Anẽ. Hãmri  
nhũm kãm: —Nà koja Tĩrtũm Karõ  
tãm tanhmã ato ka ÿ hã tanhmã  
amnhĩ to hkêttã atujarõ.

Jakamã koja akra  
kêp Tĩrtũm Kraa.



Tã nhũm Marir amnhĩ tujarô hã amnhĩ pumu  
nẽ nã ljawew wỳr hkrà kurê kumrẽx. Hãmri nẽ  
nojarêt nẽ õ krĩ rũm kato nẽ ma hwỳr mỗ. Ma  
ljawew papxà hwỳr mỗ.  
ljawew nhõ krĩa pika pê  
Jutej kamã nhỹri hixêt  
kamã na pre. Nhũm ma  
hwỳr mỗ hãmri nẽ hwỳr  
pôj nẽ ljawew wỳr axà  
nẽ omu nẽ kãm: —Ka?  
Xà wa amex? Anẽ.  
Hãmri nhũm kuma nẽ  
kãm: — Ý ma wa  
inhmex na pa wa ixpa.



Anhỹrja kôt nhũm õhy kamã hkraja haxwỳja  
te kot Marir kapẽr mar nẽ amnhĩ nhĩpêx  
pyràk o htu kamã àxônh tỳx o nõ. Hãmri  
nhũm IjapewTĩrtũm Karõ  
nhỹ hã tanhmã Marir mã  
kapẽr to. Kàx pê kãm  
kapẽr nẽ kãm: —Xê  
gàa nẽ. Ra Tĩrtũm kot  
ato mex jakamã na ka  
akĩnh rax o mẽ inhni  
hkwỳjê jakrenh pa.  
Anhõhy kamã akraja  
koja Tĩrtũm amã ho  
mex rax nẽ.



Tã ã mẽ hixi jarēnh kot anhÿr kanrēhã na pre  
ã Jejus Kris kator anē. Nhũm  
pre kormã Jujeja Marir o hprõ  
kaxyw. Nom kormã ho hprõ  
hkêt ri nhũm htujarô. Kormã  
hkukrit tã nhũm Tirtũm  
Karõ tanhmã ho nhũm  
htujarô. Hãmri nhũm  
Jujeja harēnh ma nẽ  
tee ri hamaxpěr nẽ htÿx  
nhãm mēhõ kot kēp htu hã  
hkamnhĩx. Juje kot tãm  
amnhĩ nhĩpêx nẽ tãm  
hamaxpěr jakamã tee ri kot  
ho hprõ hkukamã hamaxpěr.



Ně hamaxpěr o: —Nà pa mǎn  
ixte htire hǎ. Nhǎm mēhǒ ra  
kot ǎ hipêx anhỹr kēnǎ. Nà  
kot paj ho ixprǒ hkêt nē.  
Nom kot paj ixkwỳjê mǎ ǎ  
kot amnhĩ nhĩpêx anhỹr  
o amnhĩrĩt kêt nē. Kot  
paj anē nhũm mē  
kuma nē ho kapěr  
punuj nhũm amnhĩ kamǎ  
hpijaàm tỳx nē. Ja pymaj  
kot paj ixkatàt kôt hkaga  
kurê kumrēx. Nom ixkwỳjê  
hkàx ǎ hkaga. Anē.



Ně ã hamaxpěr anhỹrja o ra gõr ně nõ. Nhũm Tĩrtũm kapěr o mẽ wryk xwỳnhjê hõ hwỳr wry nõ hwỳr axàn kuri xa. Hãmri ně kãm: —Pa Juje? E ot pa awỳr tẽ. Kwa tee ri Marir o aprõ hkukamã ajamaxpěr punuj kêt ně. Mãmri ho aprõ. Mẽhõ kot apê tanhmã ho hkêt. Tĩrtũm Karõ na pre ã hipêxanẽ. Jakamã kwa tee ri ajamaxpěr kêt ně mãmri ho aprõ ně war apa.



Koja hkrare kato nẽ myre nẽ hprêk. Hãmri nẽ mẽ kot  
hkôt amnhĩ xunhwỳr xwỳnhjaja mẽ kot amnhĩ tomnuj  
piitã pẽ mẽ utàr pa. Jakamã koja kato ka wa  
hã hixi mẽ nhũm kêp Jejus. Anẽ. Nhũm  
pre ã Tĩrtũm kapẽr o mẽ wryk xwỳnhja  
kãm kapẽr anẽ. Ijaew kapẽr kãm Jejus  
jarẽnhja te kêp “Tĩrtũm kêp mẽ papytàr  
xwỳnh” anhỹr pyràk.



Jakamã nhũm Tĩrtũm kapẽr o mẽ wryk xwỳnhja Juje  
õt kãm ã kãm Marir jarẽnh anẽ. Jakamã nhũm Tĩrtũm  
kapẽr o mẽ wryk xwỳnhja Juje mã kapẽr  
par mẽ nhũm hkrãkato. Hãmri nẽ kot  
kãm ujarẽnh xá hkõt Marir o hprõ. Nom  
kormã tanhmã ho hkêt nẽ ri o pa rãhã  
nhũm hkrareja kato. Hãmri nhũm wa  
hã hixi mẽ nhũm kêp Jejus  
nẽ mããnẽn kêp  
Emanuew.



Na pre ã Jejus kator anẽ. Nhũm pre Rõm nhõ xwỳnhjê  
nhõ pahi Sesti Akusja õ pika piitã hkõt mẽ ho kõta  
kaxyw. Aa kot mẽ ho kõta  
hkõt tã ra kot mẽ ho kõta  
kaxyw.



Kormã pahi Sirën haxwýja kot pika pê Sir kamã mẽ  
ho amnhĩptàr ri nhũm pahi Sesti Akus kot mẽ ho kõta  
kaxyw. Jakamã kãm àpênh  
xwýnhjê mã kapêr nẽ mẽ  
kãm: —E kêr ka  
mẽ ho kõta  
kaxyw nẽ mẽ



piitã mẽ hixi hã kagà hpa. Anẽ.



Hāmri nhũm mẽ piitã ã kot mẽ hipêx anhÿr ã amnhĩ tã  
harēnh ma hāmri nẽ mẽ kot mẽ hixi hã kagà kaxyw piitã  
akupÿm papxà hwÿr ma  
hapêx. Nhũm pre Marir  
mjên Juje haxwÿja  
ma krĩ pê Perēj  
wÿr mỗ.



Garirej kamã õ krĩ pê  
Najare rũm kato nẽ ma hwÿr mỗ.



Pika pê Jutej kamã na Perēja. Kamã na pre Juje nhīgê  
Tawija kato. Nhũm Juje kêp kanrêhã htãmnhwỳ jakamã  
na pre ma akupỹm hwỳr mẽ  
hkwỳjê hkôt mỗ. Nẽ ma  
amnhĩ kôt kot ho  
hprõ mã xwỳnh  
Marir o mỗ.



Arĩ htujarô rax rãhã nhũm ma amnhĩ kôt o mỗ.



Nhũm wa mõi hãmri nẽ  
hwyr pøj. Nhũm Marir  
hpijagri xà hã mytwrý mã  
àr jakamã nhũm kamàt  
nhũm õhy xà.



Nom nhũm Perěj wỳr mẽ hpôx nyw xwỳnhjaja ra ixkre  
piitã ho nỳt pa nhũm wa tee ri hpijagri kaxyw amnhĩ to  
ukapi ho pa. Hãmri nẽ nhỹri  
môx nhõrkwỹ punajre hwỳr  
axà nhũm  
Marir kamã  
hpijagri.



Nhũm hkra kato nẽ myre. Kra kot wa na pre. Hãmri  
nhũm kumy nẽ kupẽxê ho hkupu hpa nẽ môx xàpkur  
xà hã kôsti kaprý kamã kuxi  
nhũm hamakêtkati  
nẽ gõr nẽ nõ.



Rôm nhũm ôwêhti jamãr o mẽ pa xwýnhjaja kapôt ã  
ri hkrit ôwêhti jamãr o pa. Nhũm ra kamàt nhũm mẽ  
hamãr o hkrĩ. Pu nhũm kaxkwa rũm

Tĩrtũm kapẽr o wrỳk  
xwýnhja  
wrỳ nẽ  
mẽ mỳri  
ajêt. Hãmri  
nẽ tanhmã

amnhĩ to nẽ  
mẽ hpuhã ho  
hirã rax kumrẽx.



Nom nhũm Tĩrtũm tãm ã mẽ hipêx anẽ. Hãmri nhũm mẽ  
tee ri jawỳ Tĩrtũm kapẽr o wrỳk xwỳnhja pumu nẽ kãm  
ma htỳx nẽ akryk omunh o hkrĩ. Hãmri  
nhũm mẽ kãm: —Pa? Kwa

mẽ amã  
ixpyma  
hkêt nẽ.  
Ixtẽ mẽ amã  
mẽmoj mex



jarẽnh kaxyw na  
pa mẽ awỳr wrỳ.



Kot kaj mẽ harẽnh ma mẽ akĩnh mẽ. Nom mẽ kapxipixjaja  
kaj mẽ akĩnh kêt mẽ. Koja mẽ piitã ja jarẽnh ma mẽ mẽ  
apyrã mẽ hkĩnh mẽ pa. Na ra ham mẽ  
akamã ukapĩ xwỳnhnta kato.

Pahi Tawi  
nhõ krĩ mẽ  
mẽ anhõ  
krĩ pẽ Perẽj  
kamã. Kêp mẽ

apiitã mẽ anhõ  
pahihti na.



Mẽ ate amnhĩ wỳr kamã ajamak o apa xwỳnh pê Kris na.  
Tãm na ham kato. E pa ixprĩ hã mẽ amã tanhmã harẽnh  
to ka mẽ inhma. Na kato nhũm  
katorxà kupẽxê ho kupu hpa

nẽ kôsti  
kamã kuxi  
nhũm nõ.  
Kwa mẽ  
tokyx ma hwỳr

mra nẽ kêp mẽ  
anhõ pahĩti hã  
omu. Anẽ.



Nhũm pre ã mẽ kãm ujarẽnh anẽ. Hãmri nhũm hkwỳjaja  
wamta kôt ohtô nẽ mẽ hwỳr wrỳ nẽ puhã  
harir. Hãmri nẽ Tĩrtũm mã mex o mex  
ã grer o harir. Nẽ hã



grer o: Tĩrtũm  
maati na mex  
o mex.



Jakamã mẽ kãm hprãm xà kôt pix mã amnhĩ  
nhĩpêx o mẽ pa xwýnhjaja koja amnhĩ tã  
mẽ omu nẽ tanhmã mẽ ho nhũm mẽ  
hamakêtkati



nẽ àmnhĩx hkĩnh  
nẽ pa ho pa.



Anhÿr o grer o harir hãmri nẽ ma akupÿm kaxkwa hwÿr  
àpir pa nẽ akunok. Hãmri nhũm ôwêhti jamãr xwÿnhjaja  
mẽ kapẽr ma nẽ ma akupÿm àpir ã mẽ omu nẽ axpẽn  
mã: —E tokyx pu mẽ krĩm nẽ Tĩrtũm kot mẽ pamã  
ho amnhĩrĩt xwÿnhhta japêr nẽ  
tokyx nhÿri omu.



Kwa ma pu mẽ tokyx hwỳr nẽ omu. Anẽ.  
Hãmri nhũm mẽ ma hwỳr mra. Hãmri nẽ  
krĩm agjê nẽ môx nhõrkwỹ wỳr agjê nẽ mẽ  
hkrareta pumu. Nhũm kôsti kamã nõ nhũm  
mẽ omu nẽ kuri Marir mẽ Juje  
wa omu.



Hãmri nẽ akupỹm hapôj nẽ ma mẽ piitã  
mẽ hkôt ri mẽ kãm harẽnh o pa. Ra Tĩrtũm  
kapẽr o wryk xwỹnh kot mẽ kãm harẽnh  
xàja kôt nhũm mẽ ma mẽ kãm harẽnh o ri  
mẽ hkôt pa.



Nhũm pre Jejus  
Perẽj kamã kato.  
Pika pê Jutej kamã.  
Pahi Erox kormã  
kot Jutej nhõ  
xwỳnhjê ho

amnhĩptàr o pa ri  
nhũm õ pika kamã kato. Hãmri  
nhũm Tĩrtũmja kaxkwa kamã Kra  
kator jarẽnh xà hã kanhêti raxta õ  
nhõ nhũm pika hõ kamã kanhêti  
ho studa xwỳnhjaja omu.



Kanhêtiya pumu nê  
hkĩnh nê axpên  
mã: —Kwa ga mẽ  
kanhêti raxti  
mũj pumu.

Mãn ra ljaew nhõ  
pahi nywta kato nhũm kanhêti mũj  
kêp ho amnhĩrĩt xà hã ajêt. Kwa pu  
mẽ ma hapêr o mõi nê nhỹri tokyx  
omu nà. Anê hãmri nê amnhĩ to  
pikuprõnh pa nê ma hapêr o pa.



Ma myt gjêx xà hwÿr  
hapêr o pa hã apkati  
xohtô nê. Hãmri nê  
ra Ijaew nhõ pika  
hwÿr pøj nê krĩ  
pê Jerujarê  
hwÿr

hapêro mõi. Pahi Erox nhõ krĩja wÿr  
nhũm mẽ hapêr o mõi hãmri nê  
kamã pøj nê mẽ hkrare nywta ã krĩ  
nhõ xwÿnhjê kukjêr o mõi nê mẽ  
kãm: —Pa? Ot pa mẽ apê Ijaew nhõ  
pahi nywreta pumunh kaxyw mõi.



Ham kator xwỳnh̃ta.  
Mẽ inhõ pika kamã  
na pa prem kaxkwa  
hkrax Anhỹr o hã  
mẽ hkukjêr

o mõi jakamã nhũm mẽ  
piitã pahi nywja jarẽnh ma  
nẽ axpẽn mã harẽnh o hprõt.



Hāmri nhūm pahi Erox tee ri  
ã harēnh anhỹrja ma hāmri  
nē amnhĩ wỳr mẽ kot hã  
àhkukjêr o mōr xwỳnhjê hã  
karõ. Nom nhỹri Ijaew kàx  
ã. Hāmri nhūm mẽ ma hwỳr  
mra nē agjê nhūm mẽ omu  
nē pahi nywta ã mẽ hkukja  
nē mẽ kãm: —E mẽ aprĩ hã  
inhmã pahi kator nywta jarẽ.  
Tanhmã na pre ra  
mẽ ate kanhêti  
pumunh ã  
mytwrỳ  
kute?



Xà ham na ka prem omu nà  
amnepê mã? E mẽ aprĩ hã  
tanhmã inhmã harẽnh to.  
Anẽ. Hãmri nhũm mẽ ihõja  
kãm: —Nà na ra hã amgrà  
axkrut kaxyw. Na pa prem  
omu hãmri nẽ inhnojarêt nẽ  
man ixpa ho ixpa ry rax nẽ  
mẽ awỳr pøj. Anẽ. Nhũm mẽ  
kuma nẽ mẽ kãm: —Tỳ. Nom  
jar amrakati. Perẽj  
kamã na xep  
kato. E mẽ  
mãmĩ ma  
hwỳr mỗ



nẽ kamã hapêr.



Hāmri nē nhỹri omu nē akupỹn  
ixwỳrmõ nē inhmã harẽ. Pa  
ijaxwỳja ma hwỳr mõ nē  
omu nē mẽ apyrà nē kãm  
mex o mex ã harẽ. Ijaxwỳja  
inhmã omunh prãm tỳx  
kumrẽx. Anẽ. Nom hêx rom  
ã ri mẽ kãm kapẽr anẽ. Kot  
nhỹri harẽnh mar nẽ hã  
àmnhênh nhũm mẽ kot hpĩr  
kaxyw nhũm hêx rom  
ã kãm omunh  
prãm tỳx ã  
amnhĩ  
jarẽnh  
anẽ.



Jakamã nhũm mẽ kuma hãmri nẽ kato nẽ ma Perěj wỳr mōr kurê kumrẽx. Hãmri nẽ kormã mẽ õ pika kamã

mẽpa ri kanhêti ho studa xwỳnhta nhũm

mẽ axte amnhĩ kukamã omu nẽ hkĩnh nẽ. Nhũm ma Perěj wỳr mẽ hkukamã mō nhũm mẽ

omunh pê ma hkôt pa rãhã hwỳr pōj. Nhũm kanhêtija pahi nywre nhõrkwỹ mỳri ajêt.



Jakamã nhũm mẽ ma hkôt mra nẽ ixkreja wỳr pôj nẽ kapem xa. Hãmri nẽ mẽ kãm kapēr nẽ mẽ hwỳr agjê nẽ

Jejus mẽ katorxàja wa omu. Hãmri nẽ

Jejus kutã hkõn krã ho hkrĩ hpa nẽ kãm kapēr nẽ kãm: —Pa Xugitre. Hêxta waa nẽ. Nà

amex o amex. Kot kaj nhỹrmã axàptàr hãmri nẽ apê mẽ inhõ Pahi Maati. Nà ãm hãmri na pa mẽ apumu nẽ ixkĩnh nẽ. Anẽ.



Hāmri nē ahp̄ȳnhā kām hkīnh xà gō. Kām ôr kwỳ gō  
nē kām mēhkuxwa xà hkwỳ gō nē kām te kot rāmre  
kuxware pyrāk pê mīraja nhūm mē kām  
hkwỳ gō. Mē hkīnh xà hā kàxpore  
xohtô nhūm prem kām ôr pa.  
Hāmri nē ra akup̄ym Jerujarē  
kamā pahi Erox wỳr  
nojarēt. Nhūm kamāt  
nhūm mē gōr nē  
hikwỹ hāmri nē ra  
amỹti. Nhūm Tĩrtũm  
mē hpimtir kām  
mē kām  
kapēr  
nē mē



kām:  
—Pa?



E mẽ inhma. Kêr ka mẽ akupỹm pahi Erox wỳr amrar nẽ  
kãm mẽ hkrata jarẽnh kêt nẽ. Ầm kwarĩ ho kwarĩ. Nẽ kêr



ka mẽ pry hõ hã mãn ma mẽ anhõ pika hwỳr  
akupỹm apa ho apa. Anhỳr o mẽ  
kãm kapẽr jakamã nhũm apkati  
nhũm mẽ kànhmã hkrĩ hãmri nẽ



Tĩrtũm kot mẽ kãm  
hã karõ xà hkôt ma  
akupỹm mẽ õ pika  
hwỳr pa kurê kumrẽx  
nẽ akupỹm pahi  
Erox wỳr  
mrar  
kêt nẽ.



Tã nhũm kanhêti ho studa  
xwỳnhjaja ma akupỹm hapêx  
hãmri nhũm Tĩrtũm axte  
Marir mjên Juje hwỳr kapêr  
o mẽ wrỳk xwỳnhjê hõ mẽ.  
Nhũm kê axte hpimtir  
kãm hwỳr wrỳ nẽ kãm  
kapêr nẽ kãm: —Pa Juje.  
E kwa kànhmã nhỹ.



Na ra pahi Eroxja aprõ pē  
hkrata ã amÿnê. Koja tokyx  
pôristi hkwÿjaja mē anhõ krī  
hwÿr pōj nē war apē hpīr  
kaxyw ri hapêr. Jakamã kwa  
wa tokyx akato nē ma  
pika pē Ejit wÿr amõr  
kurê kumrêx. Nē Ejit  
kamã apa rãhã pa

nhÿrmã akupÿn amnē  
war amē. E kwa tokyx. Anē.



Hãmri nhũm kuma nẽ kànhmã  
nhỹ nẽ Marir mra nẽ war  
amnhĩ to akuprõ nẽ ra  
nojarêt. Hãmri nẽ krĩa pẽ  
Jejus o kato nẽ ma o mõi  
kurê kumrẽx. Wa mõi  
ryy nẽ hãmri nẽ Ejit  
wỳr pôi nẽ kamã pa  
ho pa.



Tã ra akupỹm hpôx kaxyw  
htêp o mõi. Hãmri nẽ  
pahi Erox kra Akêrawja  
ra hipêêxà mỳr pê kot  
Jutej kamã  
mẽ ho



amnhĩptàr hã  
harẽnh ma. Hãmri nẽ  
tee ri mẽ amnhĩ kukamã hamaxpẽr  
nẽ kãm mẽ hwỳr wa o mõi pyma nẽ. Tã nhũm  
kamàt nhũm Juje ra gõi nẽ nõ nẽ kê axte amỹti.




Nhũm kê axte Tĩrtũm  
kapēr o mẽ wryk  
xwỳnhja hwỳr wry nē  
akupỹm ã pika hkwỳ  
pê Jutej wỳr mōr  
nē wa  
mẽ



hkurê nē kãm: —Pa  
Juje? E kêr ka Jutej wỳr wa  
mẽ amōr kêt nē. Pãnhã nhãm mẽ  
anhõ pika hõ hwỳr mãn mō nē kamã ri apa.



Aně nhũm kuma nẽ hpãnhã  
wa mẽ ma mẽ õ pika  
hkwỳ pê Garirej wỳr wa  
mẽ juk nẽ ma mỗ. Nẽ  
kamã pôj nẽ krĩ  
pê



Najare hwỳr  
mỗ nẽ kamã amnhĩm  
õrkwỹ nhĩpêx nẽ kamã  
wa mẽ pa ho pa.



Nhũm pre ra amnepêm  
Tĩrtũm nhỹ hã kapēr o  
mẽ pa xwỳnhjê hõja  
ra ã mẽ kot amnhĩ  
nhĩpêx anhỹrja  
kukamã  
mẽ

panhĩgêjtjê mã mẽ  
harẽ nẽ hã kagà. Nẽ hã kagà  
kot: Tĩrtũm kot mẽ pahwỳr mẽnh mã  
xwỳnhhta koja kêp Najare nhõ xwỳnh. Anẽ.



—Tĩrtũm kãm pika piitã hkõt mẽ apiitã  
mẽ ajapê htỳx. Nẽ mẽ ajapê xàj na  
pre ixpê Kra hã ixpyxi hã mẽ awỳr  
inhmẽ. Ka mẽ atõ amnhĩ kaxyw  
ixkõt ajamaxpěr nẽ ixkõt  
amnhĩ xãm.



Hāmri nē nhỹrmã atyk tã nhũm Tĩrtũm  
akupỹm ato atĩr ka wa ixkuri atĩr tũm  
nē amex rãhã nē apa ho apa. Hāmri  
nhũm Tĩrtũm aa amnhĩ nê nhỹhỹm  
amēnh kêt kumrẽx.



## Römãn 3:23

No mẽ pahtõ na mẽ pahte Tĩrtũm mẽ Jejus wa uràk nẽ amnhĩ nhĩpêx mex rãhã ho ri papa? Nà amrakati kumrẽx. Mẽ pahpiitã mẽ pahte amnhĩ tomnuj xwỳnh kênã.

## Römãn 6:23

Na hte mẽ kãm àpênh o ri mẽ pa xwỳnhjaja mẽ kãm mẽmoj tã apê nẽ àpênh pa nẽ hpãnhã amnhĩrer xà jamỳ. Ja pyrà nẽ koja mẽ kot amnhĩ tomnuj xwỳnhjaja nhỹrmã ty hãmri nẽ ma mẽ kot amnhĩ xà htỳx kamã hamak tũm xàta wỳr ma pa. No mẽ pahte amnhĩ kaxyw Jejus Kris kôt pajamaxpẽr xwỳnhjaja na hte Tĩrtũm ja hã mẽ pahpumu nẽ mẽ pajarẽnh o: —Nà ãm hãmri. Jajaja koja nhỹrmã Ixkra mẽ wa Ixkuri mex kumrẽx nẽ htĩr tũm nẽ pa ho pa. Hêxta waa nẽ. Nà ãm hãmri koja mẽ anẽ. Anẽ.



Xà tãm mẽ pahte amnhĩ nhĩpêx ã mẽ pahpumunh kôt  
na hte ã mẽ pajarênh anê? Nà ãm mẽ pahte Kra Jejus  
Kris kôt amnhĩ xunhwỳr ã mẽ pahpumunh kôt  
pix mã na hte ã mẽ pajarênh anê.

Eprêw 9:27

ãm pahtyk tipxi htã koja Tĩrtũm nhỹrmã akupỹm mẽ  
pahpiitã mẽ pahto pahtĩr nẽ ahpỹnhã tanhmã mẽ pajarênh  
to nẽ ahpỹnhã tanhmã mẽ panhĩpêx to. Kormã mẽ pahtĩr  
ri mẽ pahte amnhĩ nhĩpêx ã mẽ pahpumunh xà  
hkôt tanhmã mẽ panhĩpêx to.

Epes 2:8,9

Xà na pu prem pahpê hkra hprãm xàj amnhĩ krã hkôt mẽ  
papamjaja kãm tanhmã amnhĩ to mex to nẽ kãm: —E kwa  
Tĩrtũm. Na pa ã amnhĩ to mex anê nẽ ã amnhĩ to mex anê.  
Jakamã kwa ja hã ixpumu nẽ ixto akra nà? Anhỹr o  
na pu prem amnhĩ to kuwỳ? John 3:16,17



Nà na pu prem ã amnhĩ to hwyr anhyr kêt nẽ. Na pu prem amnhĩ kaxyw hkôt pajamxpěr nẽ hkôt amnhĩ xunhwỳ nhũm ja pix ã mẽ pahpumunh kôt mẽ panê mẽ pahte amnhĩ tomnuj rê nẽ mẽ pahto hkra. Kãm mẽ pajapê nẽ mẽmoj to mẽ pakutã nojarêt rãhã ho pa jakamã na hte ã mẽ panhĩpêx mex anẽ. Jakamã na pu htem amnhĩ tã omu nẽ pajamxpěr o: —Nà na xep hte Tĩrtũmja mẽ pahte tanhmã amnhĩ nhĩpêx to ho papa hã mẽ pahpumunh kôt mẽ pahto hkra hkêt nẽ. ãm mẽ pahte amnhĩ kaxyw kãm pajamxpěr ã mẽ pahpumunh kôt pix mã na hte mẽ pahto hkra. Anẽ.

Rõmãn 10:9,10

—Kot ka mẽ atõ Jejus kệp anhõ Pahihti hã harẽ nẽ Tĩrtũm kot akupỹm ho htĩr kôt ajamxpěr. Hã koja Tĩrtũm ja hã apumu nẽ anê ate amnhĩ tomnuj o hapêx nẽ ato hkra. ãm ja pix ã mẽ pahpumunh kôt na hte mẽ pahto hkra. Anẽ.



Ně na pu htem mẽ pahkrãhi kaxwỳnh kãm amnhĩ kaxyw  
Jejus mã pajamaxpěr. Ně mẽ pajakwa ho kệp mẽ panhõ  
Pahihti hã harẽ. Hãmri nhũm Tĩrtũm ja hã mẽ pahpumu  
nẽ amnhĩm mẽ pahte amnhĩ to mex xwỳnh  
ã mẽ pajarẽ nẽ mẽ pahto hkra.

Juãw 3:16,17

—Tĩrtũm kãm pika piitã hkõt mẽ apiitã mẽ ajapê htỳx. Ně  
mẽ ajapê xàj na pre ixpê Kra hã ixpyxi hã mẽ awỳr inhmẽ.  
Ka mẽ atõ amnhĩ kaxyw ixkõt ajamaxpěr nẽ ixkõt amnhĩ  
xãm. Hãmri nẽ nhỹrmã atyk tã nhũm Tĩrtũm akupỹm ato  
atĩr ka wa ixkuri atĩr tũm nẽ amex rãhã nẽ apa ho apa.  
Hãmri nhũm Tĩrtũm aa amnhĩ nê nhỹhỹm amẽnh kêt  
kumrẽx. No mẽ ate amnhĩ tomnuj mỳrapê tanhmã ixte mẽ  
anhĩpêx to kaxyw na pre mẽ awỳr inhmẽnh kêt nẽ. ãm  
ixkukwak ri mẽ atĩr tũm nẽ mẽ amex rãhã apa ho apa  
hprãm xàj na pre mẽ awỳr inhmẽ pa mẽ awỳr wrỳ.



## Wam Juãw 5:11-13

E kot paj ixprĩ hã mẽ amã tanhmã ja jarẽnh to ka mẽ inhma. Nà na pre Tĩrtũm Krata mẽ pahpiitã panê ty. Jakamã kot puj mẽ pahte hkôt amnhĩ xunhwỳr xwỳnhjaja nhỹrmã ty nhũm Tĩrtũm akupỹm mẽ pahto mẽ pahtĩr. Pu mẽ wa kuri pamex nẽ pahtĩr tũm nẽ papa ho papa. Mẽ pahpê Jejus kwỳjaja kot puj mẽ ã pahtĩr tũm nẽ papa anẽ. No mẽ kêp hkwỳ hkêt xwỳnhjaja koja mẽ nhỹrmã ty nẽ mẽ pahpyrà nẽ wa hwỳr àpir kêt nẽ. Na ka prem ixpyrà nẽ amnhĩ kaxyw Tĩrtũm Kra hkôt ajamaxpěr nẽ hkôt amnhĩ xunhwỳ. Tã pa ã mẽ amã kagàja nhĩpêx anẽ. Mẽ ate kamã harẽnh nẽ mẽ pahte nhỹrmã Tĩrtũm mẽ Kra wa hwỳr mẽ paxàpir ã mẽ pajarẽnhja mar nẽ amnhĩ kaxyw hkôt ajamaxpěr o ri apa kaxyw nẽ kapěr prãr o ri apa hkêt nẽ.



Matêwre 1-2; Rukre 1-2

Storyline by: Edward D. Hughes

Illustrated by: M. Maillot  
and Alastair Paterson

Adapted by: E. Frischbutter; Sarah S.

Apinayé Bible (apn) © 1999, Wycliffe Bible Translators, Inc.  
All rights reserved.

<https://www.bible.com/bible/514/MAT.1>

©2024 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

